

內閣奏題稿

請行大禮

八月初九日謹

奏爲恭逢

萬壽請行大典以慰中外人心事臣因禮部請

皇長子冠婚大典以重主器又查得累朝事典

凡冊立冠婚之典俱屬閣臣與禮部題請過

期不請責有所歸臣因禮部題請合宜候

旨今猶未奉俞旨臣豈能已於再瀆因查國朝

典禮皇子冠婚俱不出十五歲舉行累朝通

行未之有改今 皇長子已踰一年而

皇上未允禮部之請者蓋謂 冊立之未舉行也臣

思 冊立猶爲 國家重大之典所以定國本也

皇上注意已久天下仰望甚殷正當與冠婚並行者
伏望

皇上念主器之位从虛而 建儲之策早定乞卽

諭禮部轉行欽天監預擇吉日並行各衙門備辦禮

儀行禮以見大典皆出自 宸衷一時臣民欣喜

踴躍之情固不假言且兩京十三省祝

壽大小官員一時雲集 闕下得遇 盛典自慶遭
逢其歡欣鼓舞益喜

大聖人之作爲而和聲動于

神京和氣溢于海宇矣臣無任懽忻祝頌之至

講復常朝

八月初八日謹

奏爲祇承天變 特復常朝以肅群情以飭庶政
以新治道事臣少讀易而至說卦傳有曰古者帝
王南面而听天下嚮明而治夫帝王者天下之共
主也近而群臣之所觀瞻遠而百辟之所視效大
而嶽牧之所景從小而庶民之所向化是故於卦
取諸離於位取諸南人主南面而出治人臣北面
而受成此萬古居尊不易之定體也周公輔成王

負扆而立重居位也使天下臣民皆有所觀瞻而不敢虛也有所觀瞻而後敬心生畏心起令必行禁必止古稱帝王垂衣裳而天下治者正此之謂也自古未有能廢之者我朝至

皇祖因三殿之災移居西城始罷朝講然召對之礼卒未嘗廢

皇祖御座於簾內閣臣俯伏於簾外部中有事則召尚書諮議因此知皇祖雖不視朝而國事卒未嘗廢又多親灑宸翰出自聖意疾如風霆雷

雨卒無停留阻滯不行者然一時邪黨肆奸權臣
擅政而郡小因之竊柄行私一時朝綱國政亦多
紊亂而人心蓋戔戔矣幸 祖宗法度嚴明

皇祖英明神武權奸立斃國事始安亦既晚矣

皇上聖資天啓 睿質性成初政勵精好學不倦上

希 皇祖臣民欣然仰堯舜禹湯文武之再出

而恨無夔龍伊傅周召之臣天下欣然望中興
之盛治四海之太平者甚殷也邇年以來乃以

皇祖爲法不出視朝然前此猶月一臨焉或數月一

臨焉今曠然三年矣夫天下猶家國然家有主則一家治國有主則一國治天下有主則天下治豈有主上不出而可以治天下哉夫天下者

皇上之天下也

皇上不以天下爲重而不視朝則內外臣子豈肯以官常爲重而恪恭厥職其間賢愚強弱不同故明暗敬肆不一此在君天下者操其柄以轉移之而已欲操其柄則莫若視朝蓋人主視朝則如大明中天而魑魅魍魎莫遯其形若不視朝則如旦晝

爲晦而神鬼妖孽紛然四出可不畏哉臣請以一
時大小臣工忠邪枉直情狀不一者爲

皇上陳之大臣以道事君小臣隨分盡職今之廷臣
居高位者固多殫忠盡瘁以期不負夫生平而與
時浮沉者恐亦不少在下位者非無素懷忠赤以
勉樹夫名節而皆公行私者亦不少誠有如

皇上勅諭群臣之所言者此皆恃

皇上之不視朝無所聞見各肆其無忌憚之爲以混
朝政而其源不塞其流將長不知其所終矣夫轉

移之機實在於上今當

皇上修省之日正返災爲祥之時不拘常期間一臨
御或賜召對或面奏事舉

祖宗之舊典復昔年之故事大政大禮次第商確邊
情民隱纖悉咨訪此固南面聽治之規恭已無爲
之化天心感動災異潛消而太平可立致也况當
萬壽祝頌之期四海朝宗之日願

皇上毅然行之則朝綱肅而百官正庶事康而聖化
行中外遠近皆誦

聖天子之無逸而風化不啻行於近郊矣臣於天變
之後條陳章疏已備而特以 臨朝一言進此尤
鼓舞人心振作治理之一大機也臣老疾不能从
留佐

皇上中興之治矣

皇上今不放臣區區愚忠惟

皇上俯聽臣言斯不負留臣之心使臣得一瞻

天顏面對而去雖歸亦有餘榮也伏惟

皇上垂聽臣無任涕泣懇禱之至

請補本兵

八月二十日謹

題近該總督邢玠報朝鮮倭情萬分緊急朝鮮國
王又欲棄國逃遁且其踪跡詭秘暗差人役赴清
正處而金總兵已行脫逃慶州生員亦欲率眾順
賊矣人心離散糧草莫供我以孤軍遠戍其地後
兵未繼進退兩難此誠東方危急存亡之秋也臣
等見報不勝駭愕日夜思所以爲拯救之術而顧
念此 國家大事全賴兵部主張主張無人誰任

其各掌管兵部者須得熟練兵機又諳邊計忠貞
體國之人專心實任決非未經邊方者所能幹辦
亦非暑掌戰事者所可擔當況今天下兵事不止
一倭處處可憂處處當計倭奴倡亂則自東北至
西南遼東山東南直浙江福建廣東沿海萬里盡
當備禦矣北邊則九鎮處處日夜防虜而今四川
又以虜患見告矣西邊則雲貴兩廣時有土官土
目猺獞諸夷并緬甸安南等國俱煩處置矣中土
又有礦洞山箐及民間盜賊不時竊發皆當預防

矣此非倉卒所能答應苟且可以支吾者前以部
印付于侍郎李禎原奉 旨意止是暫掌非爲久
計而乃無尚書之 命則令何人擔當旣無擔當
之人安有認真之事臣等竊觀

皇上之于倭事隨到隨發隨請隨行

聖心亦旣獨勞于上而特厯于中矣然

皇上深居九重豈能盡悉行間之事卽臣等二三書
生雖不敢不竭力贊理而豈能旁通行間之事必
妙選得人特畀專職令其曉夜籌度悉心講求詳

利害之所歸悉緩急之所宜防東而不遺于西慮前而不失其後庶幾其有濟耳各部之事有差尚可補救于後兵事一差則國家安危在乎呼吸此何等大事而可以不急圖乎

皇上之于倭事無不急圖而但一本兵不曾急補故將士皆謂

皇上用兵之意尚在舒緩而多前却之情朝鮮君臣又謂

皇上救援之意尚在舒緩而生去就之計倭奴揣摩

皇上之救援未急而爲急攻先發之謀此無足怪蓋
形影之間原自可疑也試觀輦轂之下班行之
中能確然信

皇上之留意戎機者有幾人也而況其遠者乎夫
點用一本兵此極易尋常事耳而

皇上猶難之則事有難于此者

皇人又將何如作難而使人不疑此固將士之所以
解體而盜賊之所以生心也臣等日夜憂懼屢嘗
奏請而未得俞旨則謂聖心必有默回之

時而今日事幾逼迫不可復待不得不再三瀆陳
伏乞

皇上卽賜 乾斷勿更遲疑將吏部推上本兵前疏
亟賜 定點一員令其到任管事 國家幸甚天
下幸甚再照數臣之中衆口皆稱蕭大亨爲第一
倘得如擬則華夷共服中外交慶蓋大亨之才以
爲刑部尚書非其所長以爲兵部尚書則有餘裕
當此倥偬緊急之際臣等萬不敢爲徇私負 國
之舉尤望

皇上寬其小嫌而充其大用則大亨之感

恩圖報允當萬倍恒情也臣等不勝憂國憂邊激

切諄復待命之至謹題請

旨

再催補本兵

八月三十日謹

題適接總督邢玠塘報內開南原已于八月十六
日被倭打破副將楊元從西門殺出不知去向等
情臣等見之不覺失聲大叫震慄無已移時及閱
書札內開閑山失守西南二面無處非賊賊兵二
十萬我兵二三千而清正又向忠州來別處屯守
難撤南原自不能守全州亦難支持此時禦之于
陸岐路已多若海中無兵登萊天津皆可深慮故

今日之計水兵甚急海運甚急若閩浙一帶不必
槩爲驚惶惟當并力朝鮮爲沿標塞源之計又言
朝鮮兵糧固少本色將發去馬價須臾散盡坐以
待斃無所措手足矣又言本兵此時尚不蒙 點
聖上何不自計 社稷此當合九卿臺省叩 闕急
鳴之時也臣等手攬其書涕洟俱下照得楊元以
萬里孤軍而當萬數之賊臣等固已日夜憂其難
保今竟覆沒則何以作我軍之氣而圖屬國之安
伏想 聖主聞之必當動色靡寧矣所賴總督邢

玠經理楊鎬皆不二心之臣總兵麻貴及部下諸將盡一時之選急宜督其收功于後天津登萊係京師左臂必須大調閩浙等處水兵以戍之一則可以爲保固 中國之謀一則可以爲夾攻倭奴之計所宜急圖不可復緩其朝鮮糧餉雖絡繹轉運不絕而兵多道遠安能卽達所發馬價旣皆罄盡必須再發一二十萬前去接濟庶無內潰之憂顧此等兵食大計頭項多端少有差失 國家安危所係今無熟練本兵日夜主持籌度而但取辦

于署印侍郎豈是長策臣等屢次進言

皇上都付不理一旦敗狀來聞相視但有長歎

皇上何不以宗廟社稷爲重一至此乎那玠欲

九卿臺省叩闕急鳴此真血誠赤意萬不得已

而爲此無聊之辭也伏願

皇上卽將本兵蕭大亨准用令其亟行到任籌計

東事庶可以補前失而圖後功不然一二書生必

致誤國卽萬死何以贖罪乎臣等謹偕擬

諭帖一道伏望

皇上允發臣等不勝涕泣哀懇之至伏候

勅旨

請設監軍撫臣

九月初四日謹

奏爲倭患益熾懇乞 天威亟嚴外防以安內治
事昔經略宋應昌於朝鮮之役倡議東封而 朝
廷俯從者實以朝鮮全無戰守之策恐班師後又
來請援則中國勞師捐餉無時而已必至內地騷
動大有隱憂蓋爲遼左唇齒且使朝鮮得以休息
訓練能自戰守倭奴不敢再犯斯可以寬
皇上東顧之憂矣何意朝鮮弱不自振不知乘機修

備但欲諉援中國怠玩仍前狡詐尤甚既不助戰
又不助餉南原旣以棄城逃遁全州則又焚燬糧
草其遺中國之憂匪細矣曾不思

皇上字小之仁數年間勞我兵餉數千里疲我將士
無非爲彼防守今危在旦夕此朝鮮之最可恨也
但念倭之不能北犯中國者唯恃全羅慶尙二道
爲我衛耳倭船從海入犯必由全慶二道地角待
反風而後能進故全慶乃中國之金湯而亦朝鮮
之門戶全慶亡朝鮮必亡朝鮮一亡倭奴之入犯

必不從陸犯遼仰攻山海矣必從水路之東漢臨
津晴川大定大同鴨綠諸江分兵四出撓我四鎮
則我防倭之力分而不勝左右顧矣此目今一大
患也使倭奴一據全慶二道又可以待風而爲航
海計不獨四鎮近地可虞凡東南沿海皆時時有
切近之憂不若平時二汛之期易於防守矣此目
今又一大患也故朝鮮在所必救而全慶又當屯
兵以至沿海邊衛均當豫防但天津係畿輔門庭
至山海關僅八百餘里而登萊爲中原襟帶南至

淮安運河口三千餘里又山以東江以北之藩蔽也承平以來沿海衛所單弱處處濱海在在宜防萬一倭奴乘虛而入內無控扼外無聲援中州畿輔不無震動天津雖邇薊鎮山東原有巡撫終難遙制莫若添設備倭撫臣一員彈壓天津登萊據險練兵因而留屯無警周巡有警策應而衙門畧近天津以示特重根本則南可以防中原北可以壯神京東障海島而山海鴨綠等處聲息易達此實內防之最不可缺者其勢必至多議兵多議

餉議兵議餉不無損國損國在一時而利國在萬
世不容不亟爲更張以救危急者也更乞

皇上升 勅諭一道速遣才望御史一員星夜馳往
朝鮮如寧夏監軍故事紀錄將士功次以明賞罰
之典更懸不次之賞格鼓舞將卒以待異能奇功
之士仍乞 賜寶劔一口於該鎮督臣若將帥有
異同遲遲者許其先斬後奏庶幾深入孤軍齊心
固志仍諭朝鮮君臣衆庶示以 累朝天覆地載
之恩頻年爲彼出師之意數其爲已挾私之失情

慢荒寧之愆責其凡事聽從吾經理調度一應事
理毋得有所掣肘一應軍資毋得有所覆匿同心
併力翼濟王事則我力合而敵勢孤或犄或角當
復捷如前矣仍 勅沿海撫鎮衙門戒嚴防守應
調兵餉該部作速議處邢玠楊鏑一聽便宜設奇
用間擣虛乘利決不中制務保萬全此又今日之
急務也臣等仰見

皇上獨任焦勞東征之役夙夜靡寧與紆 霄旰之
懷特竭愚慮上懇至於本兵員缺屢請未蒙

發下伏望

皇上軫念時艱 早賜點定庶樞筦有所主持而閭
外恃以無恐其特遣監軍及添設天津登萊撫臣
事宜俱乞 採納下部議覆

宗社幸甚臣愚幸甚奉

聖旨覽卿奏潑得防外安內機宜足見老成謀國忠
猷朕心甚慰該部便看議了來說

伸救楊尚書

十一月初九日謹

題臣等在閣蒙 發下錦衣衛指揮王之楨本內
開楊新芳恭進重寶事已奉

聖旨差官前去封解夫楊兆以一介草茅致位尚書
家財至于百萬又擅造違式房墳若果有之重處
非過至于扣剋軍餉部銀實乃百姓膏脂

明旨森然懲貪罰僭仰揆 聖心固將處一以戒百
也但臣等竊詳楊新芳自稱爲楊兆之孫而舉發

祖罪似非人情必有別故況以家財恭進理宜明白具疏誰能阻之何至假粧做工軍人潛入

大內蹤跡詭譎事尤可疑疏內銀至百萬加以珍奇重寶萬一未實必將挾 旨旁牽累及良善 雷

霆之下誰能自明則破家傷命無辜受禍者將不可勝言且或借此一事更爲展轉嚇詐騙財利已亦不可知伏乞

皇上勅諭差官會同撫按務要仰體 聖心從公詳審如果所奏皆實止將本家見在財寶細查解進

違式房墳督令拆毀仍還其土地而令其子孫不得過爲牽連搜括致令地方驚擾若所奏不實尤當馳奏將楊新芳重處且此延安府縣與北虜西番切隣外夷觀望所關不小尤不可使之輕視

中國以損

皇上之威靈也臣等切思籍沒一事乃國家極重之法尤在死罪之上者必須詳允奏讞而後處斷至于章奏雖科道之所建白亦必下部院看覆奉有成旨而後施行今以極重之法止據一妄

男子之言而不加覆議迅速發行政體龐雜人心
懼駭恐天下奸民從此聞風效尤懷私挾奏何
患無詞是古人所謂爭鬪其民而施之以劫奪之
教也後雖以法禁之將無及矣更望

皇上將此等事情再加深思慎重舉動若再有妄揣
謬窺罔聽售奸者置之不理且加懲究庶見

聖心之至公 聖體之至平而天下享清淨安寧之
福矣臣等不勝仰望之至

謝 聖諭

十一月十四日謹

題臣等於初九日具揭上 奏內言楊新芳恭進
家財等事至十三日文書房官史賓恭捧

御札到閣 諭內閣覽奏朕已洞悉但餉銀是朝廷
濟邊之費軍士披堅執銳殉身爲國勞苦萬狀褫
朕以整此輩肆志剋削罔知體恤且部銀皆百姓
積蓄以納公家之用公然侵扣藐視法紀無所顧
忌奸善惡朕固怒耳卿等此說意見欲何方今

國庫民竭用兵用餉皆稱不敷官民搜括已盡誰
知徑克私囊全不體上心其撫字何在況有要直
沽名之畜動輒言君不恤民不欲裁這一事便欲
停那一事似此貪肆異常歛怨遺害職司糾正緘
口不言好生可惡且楊兆乃姑從輕處這所奏已
知道了欽此臣等莊誦宸綸不勝悚服仰惟
皇上聖心周計加惠民艱念軍士之披執甚勞而貪
吏之搜求未息百姓之脂膏難繼而盜臣之侵扣
多方不能憂國恤民但有肥家潤橐至于建言

糾事之流又多要直沽名之輩但知調停于瑣屑
不能舉繁夫巨奸明旨森然凜于霜雪臣等無
不毛骨竦然者末復寬示德意輕處楊兆而以
已知荅臣等則春溫盎然不啻如家人父子之
唯諾臣等又無不感激而至于涕零此竊念臣等
雖才質疎庸無能承順下風然視貪婪官吏不
啻若狗彘然恨不能痛加澄汰以正人心前日揭
帖開楊兆若果財至百萬重處非過意正爲此原
非敢爲楊兆解說亦非別懷意見但區區犬馬第

恐所奏未必的確而欽差之人奉行太過求滿前數則揚新芳必將胡攀亂扯貽害無辜延安近邊地方關係不小故欲

皇上密勅差去內官止將見在封進不必多爲連累則臣等過憂過慮之愚忠欲以仰贊

皇上寬仁之至治耳況夫四方刁潑之人無處無之若妄謂聖心可以窺伺而懷私挾詐紛紛告訐則

皇上本以懲貪而人將反疑以取財本以惜民而人

將反疑以擾民臣等誼叨股肱心同休戚實不忍使天下後世以此不美之名加于

皇上也大抵天下之事循常襲故則人心恬安一爲希闊超格之舉便致驚駭臣等日在清光之下豈不能仰窺

聖心之無私顧中外臣民豈能盡知卽臣等竭吻傳告方且疑臣等爲導諛爲文飾日夜念此不若求皇上行好善惡惡之心而消融其可疑可譏之迹尤爲至治之光也除原奉御札遵藏閣中外

奏題稿

卷之十

四十四

謹具題回 奏以聞

恭進經書講章

十二月二十三日謹

題先該臣等題稱每年終將講過經書講章類寫
進呈以備

皇上溫習觀覽仍另書發司禮監接續刊板已奉

欽依節次 進呈訖今查萬曆二十四年至今所撰

講章謹將大學衍義孟子萬章曰父母使舜完廩
捐階起至子曰參乎吾道一以貫之止一本中庸
喜怒哀樂之未發起至老吾老以及人之老止一

本詩經大雅敦彼行葦起至桑柔止一本大雅倬
彼雲漢起至召旻止一本周頌於穆清廟起至般
於皇時周止一本魯頌駟駟牡馬起至商頌殷武
止一本通鑑纂要漢哀帝建平元年策免大司空
丹爲庶人起至以孔光爲帝大傳馬宮爲大司徒
止一本漢平帝元始元年益州塞外蠻夷獻白雉
起至哀章作銅匱以獻莽止一本新莽廢孺子爲
定安公起至遣上公王匡攻洛陽止一本更始元
年玄北都洛起至蕭王遣將軍鄧禹將兵入關止

一本以上共十本類寫裝潢進呈伏望
皇上萬幾之暇時加觀覽以求溫故知新之益臣
等不勝惓惓效忠之誠謹具題以

聞

內閣奏題稿卷之七

請行大禮

正月初九日謹

題伏見新年以來氣候融和風日光霽屢降瑞雪
豐稔有期天意眷歆人心暢悅咸以爲四海太
平之兆一人有慶之徵也臣等叨居輔弼調燮
無功實懷踴躍歡忭之心未遂快瞻面祝之願
惟朝夕焚香祈我

皇上萬福彌萃萬壽彌增耳竊謂當此陽春開泰之

時宜舉吉祥大喜之典昨見禮部揭帖以

皇長子冠婚爲請此乃極大最喜之事惟望

皇上裁自聖衷以迎宗社新至之禧不勝幸甚

蓋

皇長子今年已十七歲茂齡不爲幼矣冠婚二禮時
不可以復遲事不可以復緩前已具請非敢多

言其候

皇上特渙綸音傳示禮部俾斟酌儀注上請仍
示各衙門將合用各項錢糧早爲備辦通行京城

內外八府妙選淑女以應好逑庶不致倉卒難備
臣等乘春伸祝因事效忠伏望

聖主俯納不勝忻躍仰望之至

請儲邊材

正月十八日謹

題臣等連日接得東征塘報我兵之在朝鮮者與倭苦戰破其一城三寨而清正尚在島山城中堅壁死守我兵仰而攻之甚難爲力四面援倭源源而來呼吸之湏成敗懸殊臣等日夜關心日夜跂足不敢以一勝爲喜實以未了爲懼也顧隔越千里徒有此心而力所可爲者在于廟謨今廟謨尚多缺失獨特一戰以爲孤注豈不危哉臣等

所謂廟謨之缺者云何夫兵部謂之本兵謂之樞筦乃以其事付之侍郎李楨本官拘守文義不諳軍旅夫美錦不可付學製之人美玉不可付拙工之手無濟于事抑且有傷

皇上何取于楨而以大權付之因循不改彼胸中本自無奇安望其慮遠憂深而預籌勝筭以擔當軍國大事乎念此慄慄竦骨寒心者一也其在朝鮮止靠邢玠楊鎬二人以獎率諸將耳聞楊鎬躬親臨陣出入于矢石之間奮不顧身誠可倚藉然在

朝廷亦宜預先作一準併萬一此人有少差跌數
千里外何人代之萬一邢玠復有不虞何人代之
此等事機關係不小有備無患皆當預籌者二也
今本兵不思吏部不管各衙門不言但恃

皇上之福德與

祖宗之威靈 天意固爲眷顧人事亦當修舉不宜
第曰靠 天而已也天下之常才甚多賢才甚少
若非妙選不得其人雖得其人亦當收羅于 朝
端或移居于近地一遇警報之時可以被 命卽

發猶恐縮地無計不無嫌遲况可都置不講而束手觀望哉今 朝廷之上官多不補孟子曰不信仁賢則國空虛空虛之甚必至顛仆智者一思深可悚息臣等以爲小臣所管者惟一事未補尚可兼攝大臣則上衛 天子鎮 國家下治萬民制四夷領萬目之綱造多方之命必不可以不補補亦不可非其人也查得隆慶年間因北邊多事特添設兵部侍郎二三員以備督撫之選

凡帝留心邊務廣儲賢才如此誠萬世所當法伏望

皇上加意于用人一節不以愛惜名器而並虛緊要
大僚 特諭該部將各部院堂官一一遴補以重
朝廷又收羅堪克督撫兵備親臨戰陣之人分布
于薊遼近地以備緩急庶幾平居無事可資其籌
略而修廢墜之典倉卒有事可藉其才力而應助
勦之務不至有臨渴掘井援木求魚之患以上各
官或 勅吏部秉公竭忠再加斟酌推舉或將吏
部節次所推斷自

宸衷欽點發下仍令廣詢博求備用之人不得以尋

知
常才品徒取克位國事幸甚臣等幸甚謹具題

催行大禮

二月初三日謹

題竊惟

皇長子冠婚二禮臣等屢次上懇未奉

聖俞連日各衙門文武臣僚無不披誠敦請者臣等
恭候 綸音未敢隨衆進竇乃今逾時尚爾寂然
中外遑遑皆來責備臣等何不勤請則臣等亦但
俛首引罪無能開一口以謝衆人也竊惟天性之
親必不待于人言天倫之敘必不可以人爲

皇長子爲

皇上胤續之元倫序之始儼然成人之日若使冠婚
旣行則以後諸皇子麟趾森森螽斯蟄蟄凡有
吉禮皆可接續而舉不至擔閣若

皇長子之禮旣有愆期則諸皇子之禮必難越
次時日愈將壅遏禮儀必且停滯錢糧難以猝辦
觀聽亦有未雅且此一事各衙門文武大小官員
不待約會而合辭固請者豈其不畏煩瀆之誼哉
蓋亦因萬邦萬姓交責于下謂其緘默容身而恐

陷堯舜于有過之地也畏名畏義逡巡囁嚅觀其
奏辭尚不能據陳萬一亦可以情亮而心察矣

皇上至聖至明豈不洞燭效忠者之深

皇上至仁至慈豈不篤愛

皇長子之厚

皇上至英至斷豈不揆度義理而決幾微牽纏之累
今臣等之請無非文武百官之請文武百官之請
無非萬邦萬姓之請同然之情有難違拂試取舊
年天下鄉試錄觀之孰不以

皇長子冠婚爲策問者天下青衿之士孰不以冠
婚爲策對者所以臣等寧吐肝嘔心于

聖主之前而不敢得罪于天下萬世之公論也伏祈
皇上仰繹 九廟神靈篤生元子之意先聖先師創
禮維世之心副四海之歡悰弭萬方之私議使

聖名不著而無闕 聖德益顯而不渝斷自
宸衷允行大禮臣等不勝幸甚

斗催請行大禮

二月二十五日謹

奏爲冠婚大禮更不可遲懇乞

聖明乾斷速賜舉行以慰中外人心事竊惟

皇長子冠婚二禮臣等舊冬新春五揭陳請未

蒙俞音昨日禮官言官五府六部九卿大臣皆

具疏申請情詞懇切實以朝廷大體所關天下

觀望所繫不容已也若近日

聖諭頒閣舉素問男女婚嫁之說乃上古無徵非常

秀是系
今正典臣等比具揭詳辯不敢奉
詔亦不敢傳
示於外以滋天下議論竊念此事在
皇上天理至愛中夜清思必有展轉未安者又何待
臣等之累瀆而不已也

祖宗成法具載 典章累朝遵之而天下宗藩臣庶
咸相守無異今

皇長子年當十七矣此時行之猶謂其遲尚可遲
至十八歲耶臣等每當侍班接見 睿體充盈宜
諧嘉偶聰明日啓允協元良當此陽春之時速舉

大慶之禮將見 綸音渙發而衆志懽騰矣夫父子
之愛天性也卽閭閻小民之家子長未冠男大未
婚凡爲父母誰不動念若婚娶過期則鄉隣譏笑
況 帝王之子反不如士庶之家不冠不婚成何
禮度傳之天下後世能免譏議哉外傳

皇上新春召見

皇長子撫愛甚篤奈何於此大禮遲廻而尚不決
也臣等荷蒙 主上眷遇愧碌碌無能爲報念此
事關係 宗社根本 國家極大典禮非它務可

比一日未行則臣等一日之咎責難辭 君父分
義捨此不極言匡贊於心何安又惟 冊立之請
經今已八九年天下顙望日切一日 冊立有待
猶可言也冠婚何事而又何待大婚選擇淑女以
待猶可言也若冠禮何難而又何待近日朝覲官
員并赴試多士四方來京庶民咸相疑問莫不欣
欣顙望快覩 盛典豈有他意不過愛 君之至
而因愛吾 君之子也本爲正大光明之舉而或
啓猜疑惶惑之端臣等義關休戚不憚苦口伏望

皇上俯察忠言亟下所司將

皇長子冠禮目下先行仍令行各處選擇淑女辦
理錢糧以俟大婚之典至於

皇三子亦宜擇吉出閣讀書庶吉典行而人心胥
悅名分定而羣疑可消此 清朝今日第一盛舉
也臣等不勝懇切仰望之至

三次催行大禮

三月二十七日謹

題竊惟

皇長子冠婚 事在京及南京各衙門俱具疏懇
請臣等亦屢揭密請不厭煩瀆之甚未蒙

聖慈俯允今各衙門又具疏申請非群臣喜爲多事
實緣

皇長子年已十七比之尋常冠婚大爲過期天下
無不同心愛戴

皇上者則無不同心愛戴

皇上之子者默默無言卽爲廢職其誰敢乎臣等竊

惟

皇上常欲使天下萬物各得其所雖匹夫匹婦咸無
怨曠然後安于心豈有親爲

皇上之子而不加之意固知宸衷之真愛比臣等

更切萬倍大禮之優隆必有萬倍出于臣等擬

議之外者但明命一日未下則天下一日未安

中外諸臣所爲遑遑也竊念此事甚不難處而關

係又大只在

皇上斷與不斷之間耳

皇上何不斷而行之乎蓋禮雖自聖人而制乃聖人之身亦未嘗頃刻而違夫禮法雖自王者而定乃王者之身亦未嘗頃刻而違夫法此禮此法其來已遠累朝遵行無敢踰越

皇上一舉一動皆循禮法留命不發何以教訓天下臣等辭不達意而諸臣之疏具在豈無一言可以感動聖心伏惟

皇上少假清燕之閒 歷賜覽觀雖是芻蕘必有仰

裨萬一者 早發 明命完

皇長子冠婚大典上以光

祖宗之德下以慰臣民之望臣等無任瀝血百懇之

至是日府部科道各衙門等官各一本俱詣

文華殿恭進候 旨于闕下云必得命乃敢退

上遣司禮監太監田義出

諭曰此是大典但皇長子元氣單弱少候時月豈可
以此要挾君上意欲何爲知道了群臣各頓首退

因病辭俸

五月初九日謹

奏爲衰年久病痊可無期懇乞

天恩容臣辭俸以免曠官以安臣分事臣自昨年二月患病至于八月屢上疏而不得請不得已扶病復出在閣辦事旣苦于心思之昏昧入朝趕走又苦于步履之艱迤此同事二臣靡不憐之在朝諸臣靡不知之者祇因奏疏繫寶不敢復有陳乞且冀從容調理猶可漸次完復不意至今年二月因

有感傷病體益甚醫者皆謂衰年血氣虛耗決非
歲月可調必須安居靜攝假以歲時調以飲食佐
以藥石庶可望痊若復從前多事不能靜攝則本
原益虧病體益甚臣聞其言不勝悚懼因此不懼
唐突疏請再三俱蒙 勉留

聖恩高厚 天語溫存臣非木石豈不知感但臣以
衰年得病幾及兩年計時月已不勝其從容論調
理且無復有餘力而病日纏綿有增無減雖

聖心未加厭絕閣務自有司存然臣以病軀偃卧前

後幾餘一年非止假滿三月尚復掛名支俸是天
祿可虛位而竊取也臣今至此不惟爲性命惜且
當爲廉耻情

皇上於此不惟爲臣破姑息之愛且當爲臣全廉耻
之義自今日以後願卽奪臣之俸俾得從容調理
若痊可有期則臣尚有戴天之日倘病終不痊惟
皇上哀而憐之放臣回里得正首丘臣之萬幸也臣
無任籲天懇禱之至奉

聖旨卿宜遵屢旨從容調理以慰眷注之懷痊可卽

出臣輔俸不准辭吏部知道

催用閣臣

六月十四日謹

題爲閣務繁重懇乞

聖明亟下廷推之旨以弘輔理以定群心事本月初

三日傳奉

勅諭

云

欽此臣等仰見我

皇上垂神政本欲博選才賢以廣忠益不勝感激卽
於次日具疏題請廼數日以來未蒙

明旨中外臣工頗懷疑惑而御史汪先岸又復以此

論列夫先岸不知臣等題請之數業經具

進以此責臣無足怪已獨念密勿重地樞機至繁中
外多虞叅贊宜慎況累朝以來閣臣或六七人
四五人原無定員今閣臣止三人而臣位已被論
回籍臣一貫尚給假未進止臣志臯力疾入閣夫
當此政務紛紜羽書旁午卽以伊傳周召之賢尚
費拮据而臣志臯欲以衰病踈庸之人與一貫共
肩佐理譬之以蚊負山必不勝任矣矧

新諭旣頒群情仰切倘或久延則臣病終不能支衆

疑愈不能解將來責備臣等者又不止先岸一人而已今在任在籍諸臣其學術人品莫逃於

聖鑒伏乞

皇上斷自 宸衷簡求賢哲以克是任或 俯俞臣

等疏所題 勅下吏部會同九卿科道等官推舉

上請

望明簡用以昭公道以服輿情庶群賢彙進輔弼有資上可以慰

皇上側席之心下可以免臣等曠瘼之議矣臣等不

漢書

卷之七

十六

勝激切祈懇待命之至

再疏催用閣臣

七月初四日謹

題爲閣務煩重三懇

聖明博簡才賢以隆政本事項者臣等遵奉

勅諭題

請閣臣未蒙

票發復該臣等再疏以

請及科道諸臣汪先岸徐觀瀾喬璧星相繼具題亦

未奉有

俞旨竊惟閣臣之設所以備

顧問贊

樞機職務最煩責任最重必延登俊又廣集衆思

乃可以裨益

皇猷共臻治理仰惟

皇上聰明天挺總覽萬幾臣等識闇才疎固不能仰
贊萬一近且各部員缺諸疏一時並蒙 發下政
化聿新廢垂具舉臣等實不勝欽戴第推補閣臣
未荷 俯俞固知

聖心淵默非臣下所能仰窺惟是臣志臯衰病侵尋
久欲退避懇辭已非一日近值閣中虛署復自念
狗馬之軀尚未委填溝壑則重肩未息職業猶存
顧何敢自惜以重煩

聖懷是以力疾入閣強勉支持然終以精神疲耗顏

覆是虞臣一貫近遭骨肉之變復避纏綿之疾心
志未寧思慮且窒是臣二人者雖居無事之時猶
恐不勝 委任今何時也四方多事災患頻仍島
夷有竊據之虞內地增徵輸之擾人心搖動頗有
隱憂政本重地豈宜乏人嘗觀

累朝以來閣臣四五人或五六人居常得以交修職
業臨事得以共濟時艱並未有若今日止臣等二
人之寥寥在閣也伏乞

皇上念密勿重地難以久虛乞卽 勅下吏部會官

奏題稱

推舉上 請簡用庶衆賢並進而臣等得以資匡
襄之益解負任之虞矣

宗社幸甚臣民幸甚

三疏催用閣臣

七月二十二日謹

題臣因閣臣缺人三疏陳請未奉

俞旨日夕瞻望伏念閣臣上佐萬幾下總庶政責任宏鉅至蒙發下章疏擬票裁決可否於一時擬議必須參酌往時常備官三四員或五六員猶恐知慮未周顛覆是懼乃今臣一貫抱病在告止臣志卑一人供事矧年紀老大知識昏庸徒竭精神毫無補裨且一日之間爲時有幾一人之見豈

能盡周凡事于軍國重務而未易裁決者須合衆見以議之恐恐然猶慮上無當於

聖心下有拂於衆志況當今之時何時也東倭寇報屢聞四方征調不息

主上有宵旰之憂人民多驚擾之苦而可使一衰庸老臣贊襄

聖主其不至於僨國家之事者鮮矣此臣等所以不避煩瀆而屢次瀝誠以請也且衆正盈朝則四夷觀望昔宋起司馬光於洛下金人輒戒其將士

不可犯邊中國再相司馬矣是豈啻十萬之師已
哉伏望

皇上下明詔卽起素有德望二三舊臣或

特簡見任諸臣二三人同心輔佐則賢才進而萬政
理倭奴聞之將不戰而自退矣臣等無任懇切企
望之至

進呈 訓錄

八月初三日謹

題爲進 呈 訓錄事先該臣等欽奉

聖諭謄錄 累朝寶訓及實錄隨照萬曆十八年謄
寫事例開款題奉 欽依卽於二十四年五月開
館照前式樣挨次謄錄臣等督率各館謄錄校對
官吏人等併力供事寫完

列祖寶訓實錄通共二千三百四十五卷臣等分屬
禮部侍郎等官會同節等校對明白裝演成帙共

爲百套恭捧 進呈仰惟

皇上憲法

祖宗觀揚 謨烈欲以 累朝之信史用籍朝夕之
覽觀 德音甚盛顧卷帙已踰二千謄寫僅及三載
欲盡加繙閱或未能周必次第考求自然有益伏
望

皇上於萬幾之暇日 逐詳覽庶典學緝熙永爲 立
政脩身之助且 紹庭陟降益增繼志述事之光
臣等不勝懽懽願望之至其効勞人員容臣等另

行分別題奉

聖旨覽卿等所奏謄錄

累朝實訓實錄今已完成朕心嘉悅奉安御前恭備
詳覽其効勞人員便開叙來

陳議東事

十一月十一日謹

奏爲東征平定無期國事驛騷可慮懇乞

聖明神斷并集 廷議以圖長勝久安事臣卧病床
蓐間復聞東征大舉敗績不勝憤懣顧此身雖病
此心未死誠不忍見 國事决裂至此謹將東倭
始末叛順無常以至今日議戰議守願

皇上少垂聽焉臣嘗閱載籍東海諸夷限山阻海惟
倭奴最稱雄長附庸者百餘國至唐始更號日本

洪武初寇山東淮安浙江福建旁海諸郡於是遣
萊州同知趙秩

賜璽書諭王責其入貢不從發舟數千襲我爲風飄沒
自是不與通者數十年秩歸後遣僧入貢亦屢寇山
東福建沿海地方

上乃命湯和築登萊至浙江沿海諸城防倭衛所又
築山東福建海上諸城自是貢寇無常永樂間都
督劉榮守遼東倭兵復至榮合兵圍之斬首甚衆
自是不敢窺遼東正統間寇大嵩大肆荼毒假進

貢之名肆殺戮之慘歲以爲常嘉靖間中國豪強
招集倭衆雄據海上而肆其毒於內地遣總督胡
宗憲招遠近雄兵智謀勇敢之士又搜括東南財
賦歷十餘年而浙直之患始息迄今三十餘年矣
朝鮮君臣積弱不振關白恃強興兵直搗其國
皇上恤弱推強遣將援救攻取平壤三戰連捷醜夷
寒心而封議遂起遣使來廷而封議遂成於是
封詔下矣冠服賜矣李宗城楊方亨二使遣矣不意
行至中途變起不測奸臣構危言以愾正使而宗

城於暮夜逃出金山之營矣宗城統袴子也上詘
天威下忌衆口敢爲陳情祇自受罪而

皇上先後禦倭初不失着何者因倭夷之攻朝鮮而
興兵救之爲以大惜小之仁因倭夷之請封而遣
使封之爲柔遠能邇之義此正

天地包荒之量與

列聖禦倭之計若合符節夫封旣不成則自當主戰
顧戰非孟浪以冀僥倖也必內固根本有磐石之
安外度機宜有壓卵之勢然後一戰以收全功如

兵法所謂役不再籍糧不三載先勝而後求戰之說可也若不可戰則當堅守以俟瑕隙或屯田以贍軍需或練兵以蓄銳氣如趙充國之坐因先零諸葛武侯之雜耕渭上可也乃今不量彼已不度勞逸惟悻悻然以思一逞先敗於南原方整頓收拾兵糧粗集而去冬再敗於蔚山更整頓收拾兵糧大集而今冬三敗於泗川夫合水陸十萬之師四路一時並進孰不謂智慮已周謀畫已定可以制益倭之死命矣何中路以被誘大敗東西兩路

亦以攻城損傷陳璘兵船又何以被焚掠耶四路
之師一時潰敗近又倉皇無計斂跡退防駕言以
待查勘矣是銳氣旣已阻消輜重業已散失又未
知將何整頓收拾以圖再舉也况東事自更局已
來又復二年有餘竭四方水陸之運集遠近征調
之兵人情洶湧海內騷然前赴朝鮮猶水趨壑曾
不能得釜山尺寸之地三戰三敗貽笑倭奴耻辱
中國亦已甚矣豈朝廷之錢糧百姓之膏血數萬
之生靈爲博功名之兒戲耶臣竊爲用此忿兵原

無勝理蓋倭集金山去日本一帆而近彼之轉輸
援救順流而下朝發可以夕至而我陸隔遼東水
絕大海相距數千里兵馬不勝奔走之勞糧餉不
勝搬運之苦此其不利者一倭坐據重城三窟聯
絡或以逸待勞或以近制遠而我裹糧東芻野棲
露宿欲以仰攻其堅此其不利者二有此二不利
安見其能勝也今丁壯已斃於鋒鏑縱欲再調不
過柔弱之徒况宣大山西薊遼諸鎮連年徵發戶
籍空虛北虜乘機時挾貢賞其勢決難再調若腹

裏召募率皆烏合卽如前贄畫主事徐中素上疏
自稱平日蓄有死士三千比及東行旋於京城內
外招集市井傭販之流此輩目不識旌旗耳不辨
金鼓泗川之敗正是此兵言之令人可恨兵可再
調乎東征歲費藏金數百餘萬山東浙直閩廣於
常賦之外又加六七十萬間閭窮民不勝剝削加
以旱澇之災重以開採之役逃竄流離人不堪命
餉可再運乎及今以往若不長慮却顧以圖久遠
之計將見在朝鮮則專藉

天朝爲其報復終無念亂圖存之心在 中國則兵
疲糧竭脫有奸徒乘機倡亂如近日河南插旗之
變則在我非特不能救朝鮮且將自救之不暇矣
於時東事終何結局此臣所以伏枕而思五內焦
勞不能已於言也以臣愚謬之見遼虜不時入犯
隕將喪師尤爲腹心之疾是豈可舍近而求遠不
若令督臣邢玠仍歸本鎮與薊遼撫臣一意制虜
而以東方之事悉以委之經理撫臣萬世德擇一
大將與之協同而世德仍量加部銜以便節制限

以數年爲期先將已調集兵將逐一挑選擇其精健可用者量留若干其餘徒耗軍餉悉令撤歸然後將所留之兵分布全慶要害之處因山爲城因江爲塹堅壁把守互爲聲援然後遍歷朝鮮八道擇其膏腴之地廣其開墾分委廉幹官員責成管理仍不時查覈如某道闕地幾何秋收積穀幾何以定賞罰久則彼食自足我餉可以免運矣一面調選八道精壯之人分委曉暢將領嚴加訓練如某道練馬兵幾何步兵幾何練一隊則可撤我一

隊之兵久則我兵可以漸撤麗兵可以自守矣一切險要置以重閤設以烽堠務使倭奴不至如前衝突尤望

嚴旨切責朝鮮君臣卧薪嘗膽協力相維陪臣有不
用命者許經理撫臣卽以漢法繩之一切未盡事
宜與錢糧應請給并冗員應減去者聽世德會同
監軍及查勘科臣俱疏題請其分布將領簡在
官員聽其諮訪便宜行事如此則訓練精兵威振
屯種廣軍資饒險隘設國本固可戰則大張撻伐

直搗金山以洩三敗之耻不可戰則堅壁清野保
護八道以絕狂逞之謀是 中國之兵餉不煩遠
輸朝鮮之積弱亦可漸振卽倭奴知我有備進無
所逞亦將自圖歸計矣若內地山東浙直閩廣之
間一切禦倭事宜更加整飭如

列聖築城布兵以防侵犯此猶不可緩者臣竊謂安
內攘外今日之東事必當如是伏乞

皇上加意留覽勿視爲泛常仍

亟勅九卿科道諸臣各秉虛心毋拘成說詳議上

請速賜施行臣衰病已入膏肓萬無再生之理非不知緘默以延殘喘顧受

恩深重圖報無由況身爲首臣義難坐視卽身死亦所不惜奚暇計其他哉臣不勝激切待

命之至奉

聖旨朕覽卿奏具見老臣憂國籌邊至意東征未得取勝朕心日夜懸注正爾諮詢長策圖維萬全奏內事宜着兵部便會同五府六部九卿堂上科道等官悉心詳加議處來行卿宜倍加訓攝亟出輔

理以分朕宵旰之憂慎勿久虛延佇

答賀 聖諭

十一月二十八日謹

題昨日禮部接出

聖諭朕惟冊立分封東宮及諸親王此乃

祖宗訓章大典嫡庶長幼一定自有次序緣因皇長

子稟質清弱氣體未充况皇后年在妙冲又屢遭

不諱大難故不得已遲緩少俟耳非有別意亂危

國家昨者

大行皇妣之服已滿雖無三殿其二宮不日落成皇

長子齡已過期體已充足爾該部便具選婚舊儀
來看其冊立并加冠禮少俟二宮落成之日行朕
又思三皇子五皇子六皇子七皇子俱已長成若
再少待恐又費一番事不若亦于二宮完日一併
加冠分封庶免煩擾內皇三子皇五子年歲稍長
待分封之日可着出閣讀書親近儒臣朝夕訓誨
以開蒙塞禮部知道欽此臣等伏惟

皇長子冊立冠婚諸禮四海臣民瞻望已久

皇上海發 慈衷布宣 恩綍禮臣捧出中外傳聞

朝署簪紳舉色喜以相慶間蒼蒼赤亦踴躍而歡
呼臣等稽首跪讀大哉 王言明

祖訓之當遵序分長幼念 中宮而有待偶致延遲
茲及 禪祥遂求 嘉儷 元良早定先徵六禮
之儀 皇子分封並舉三加之典卜云其吉擬

宸居之告成愛而知勞期儒臣之納誨 言言信如
金石 事事協于典章經畫出于

宸衷作爲超于 大聖尋常之見窺測固難臣等忝
列樞機躬逢 盛美雖中宵舞蹈曾莫罄其懽衷

卽前此瀆陳翻自尤其過計竊惟本月二十五日
時當長至日輝三珥主有大喜乃知

聖意方動于淵微 玄象已昭夫靈睨 天時人事

豈曰偶然 萬祉千祥行當輻輳實以集

社稷靈長之慶豈徒釋四方疑揣之心臣等無任欣
躍慶祝之至

四懇罷斥

十二月二十三日謹

奏爲衰年病困難支手足殘疾已廢萬分不能供
事懇乞

聖慈垂憫早賜放還以全軀命事臣因病三疏乞休
伏奉

聖旨

云

欽此切念臣自病中屢有陳乞卽謬荷

眷留凡遭指摘卽曲蒙 聖鑒真遇隆於不可繼而
恩被於無所加矣際此 明時睠茲 高厚竭蹶躬

盡瘁之力以仰報

皇上曠蕩之恩固人臣之義亦病臣之心也但事與
願違情非假飭又望

皇上察而憐之臣患病已踰二月之久調治幸有

御醫之託使臣若非痼病必當漸有起色乃今日
復一日未見稍減愈覺增重左手既不能持左足
又不能履卽前脾胃泄瀉今且遍體骨蒸前痰火
上炎今更頭目昏暈呻吟床褥氣息奄奄與死只
一間耳蓋緣氣血衰耗非藥石之所能扶非鍼砭

之所能救然則

皇上留臣者尚冀臣可以復出勉効驅馳其如廢病之人必無任事之理密勿之區又豈養病之地在朝士紳亦有詣臣卧榻看臣者見伶仃病苦之狀莫不惻然動心臣亦自恨

請告之遲不意衰年而膺廢疾若此也伏望

皇上憐察真情毫無虛假 早賜放還俾臣抱骸骨以歸故里不但臣感再生之 洪恩而臣之子孫亦當戴 天恩於世世矣臣無任感激懇望之至

奉

聖旨朕覽卿奏知疾尚未平宜寬假安心調攝春陽
伊適易於導迎還着差去御醫上緊視療以慰朕
佇待之心所辭不免吏部知道